

■ GLOSSA

«Blick»: Pli sanester e main blut

DA CLAUDIA CADRUVI / ANR

Il Blick daventa pli e pli sanester. Onns a la lunga han ins pudì sa fidar sin el. Sin pagina trais era la blutta. Ils asilants eran criminals. Ils sanesters atgnamain era. Haschisch era ina droga mortala.

Dapi in temp ha quai midà radical. Cannabis p. ex. n'è insumma betg pli privlus. I par bunamain, sco sch'ìls redactors dal «Blick» avessan sez pruvà ora quai. Ils asilants na vegnan betg pli fatgs giu uschè consequentamain. E la blutta sin pagina trais è svanida. Pirsuenter chatt'ins adina ina istorgietta da sex insanua entamez la gasetta – ina che cudizza anc bler pli fitg che be in banal maletg blut.

Ch'ìl «Blick» ha midà cassetga era politicamente main han ins pudì observar a moda eccellente l'entschatta da quest'emna: Sin il frontispizi dal glindesdi paradeschan ils chaus da *Christoph Blocher* e da *Simonetta Sommaruga*. Tranter las duas testas stat en la scrittira la pli gronda ch'i dat: pps 28 pertschient, pss e verds 32 pertschient.

Il «Blick» relativescha pia ils himnis che tut las autras gasettas e medias chantan. Betg la pps è la ferma, mabain l'ala sanestra ensemble cun ils verds. Quai è il messadi dal «Blick».

Era il mardi cuntinua il «Blick» sia lingia sanestra. El rapporta sin pagina dus l'emprim tge propostas che *Christiane Brunner*, la

presidenta dals sanesters, fa per eleger il december il cussegl federal: Numnadamain d'eleger per Villiger in successur da la pps e suenter dus onns substituir Deiss cun in nov cusseglier federal da la pld. Pir suenter notescha il «Blick» ils giavischs da las autras partidas.

L'emprim mument pari suspectus che la pli ferma gasetta da la Svizra tschenta tuttenina ora sias lettras grassas a favur dals sanesters. Tge èsi capità cun «la pli ferma gasetta svizra», cun la gasetta che obedescha sulet a las reglas dal martgà? Daco scriva ella, gist uss che la pps gudogna ad in gudagnar, tuttenina per ils sanesters? Il quint è simpel: 28 pertschient pps fa pli paucs lecturs che 32 pertschient sanesters e verds.